

Prèju de late, prèju de gana

Su pastoriu, galu oe in Sardinna at unu pesu econòmicu de importu cun 12.000 aziende ispainadas in totu sas biddas de s'ìsula. Duas partes de su late de berbeghe e prus de su mesu de su late càprinu italianu est produidu in Sardinna. Su pastoriu at unu balore sotziale, culturale, ambientale ca mantenet galu bias sas biddas de intro de Sardinna, est unu mèdiu contra a s'ispopolamentu e pro cuntrastare su degradu de su territòriu. Su pastoriu est presu a sos ischires traditzionales e a su territòriu, est ispainadu in totu sa Sardinna, in onzi bidda b'at pastores. Est ligadu cun s'istòria, sa traditzione, sa tziviltade, sa cultura e sa limba sarda.

Mancari gasi sa filiera de su pastoriu dae annos non resessit a agatare un'àndala chi andet bene a totus e chi siet a tretu de fàghere crèschere ambas partes de sa filiera e no una banda ebia. Est pretzisu, duncas, a disinnare unu sistema de normas pro regulare sas relatas intro de sas partes, garantende sa trasparèntzia in totu sos momentos de sa filiera.

Mascamente pro su chi pertocat su prèju de su late (ma balet su matessi pro cussu de sos anzones e pro sa lana). Unu prèju zustu de su late garantit benistare a totus, industriales e pastores.

Ite si podet fàghere pro chi su prèju pagadu dae sos industriales siet a beru unu prèju reale de mercadu? In antis de totu bi cheret trasparèntzia in sa filiera. Pro fàghere cale si siat disinnu subra su pastoriu cheret a connòschere totu sos paràmetros econòmicos de sa produtzione, de sa trasformatzione e de sa bèndida. Oje no ischimus cantu late si murghet in Sardinna, ite zenias de casu si faghent, cantu si nde faghet, inue benit bèndidu e a cale prèjos. Mancat, duncas una fotografia crara de sa filiera, chi est netzessària e pretzisa pro fàghere unu cunfrontu intre sas partes. Si si resessit a fàghere aplicare sa Leze 44 de su 2019 - chi previdet chi sos industriales chi comporant late onzi mese divent rezistrare in sa *banca dati* de su Sian (Sistema Informativu Agrìculu Natzionale) su tantu de su late chi ant comporadu e onzi tres meses su tantu de casu chi ant fatu, su tantu de casu chi ant bèndidu e cussu chi ant in magasinu – sa chistione diat dèvere cambiare. Solu si b'at datos seguros si podet arribare a unu sistema pro carculare unu prèju de su late chi tenzat contu de paràmetros reales de mercadu a moer dae su prèju de totu sos casos, non solu de su Romanu.

Custu mecanismu diat dèvere tènnere contu, finas de su recotu chi non benit pigadu in cunsideru pro carculare su prèju de su late. In prus tocat de li bogare cabu a sa chistione de s'Iva, ca su late berveghinu est s'ùnicu prodotu de sa massaria chi benit carculadu "Iva inclùdida".

Petzi si totus pigant pessu de custas chistiones amus a àere unu prèju zustu, e no unu prèju de gana, pro pagare su sudore de su traballu de sos pastores.